

LOTU TALOSAGA 2023

UPU A LE AUAUNA:

Ou te mua'i faatalofa atu i le Suafa manumalo o Iesu Keriso, i le paia o le Ekalesia i ona tulaga faalupea. Faamalo le pale, malo le tauata'i, faafetai tautua.

O le upu moni, o le 2022, o se tasi lava o tausaga iloga i le Tala faasolopito, ona o aafiaga o le soifuaga lautele o tagata uma talu le faama'i o le Koviti-19, e le gata i le itu tau le tamaoaiga, aemaise foi le soifua tapuai o lana Ekalesia. E ui foi i vavao sa tapu ai Sauniga faitele faale-Ekalesia e pei ona masani ai, ae le'i mafai ai lava ona vaioa avanoa ma auala eseese ua ia saunia e tapuai atu ai lana fanau ia te Ia. Seanoa, ua anoanoai molimau o Vavega o lona Alofa Tunoa ona o ia taimi faigata. Ua tatou mautinoa pea, e suia ma liliu le taimi, e fesuisua'i foi aso ma tausaga, ae tumau pea le mamalu ma le Silisili ese o le Atua lo tatou Tama, aemaise lona Alofa mo ona tagata faatuatua.

O le tatou tulauveele mai i lenei tausaga fou, e le o se mea na tupu faafuaveta, ae o le faasoa paia lava lea a Lē e ona le malosi uma lava, o mea na ia faataoto i le faavae talu le amataga, o le Alofa e faaopoopo pea i le Alofa.

Manatua, o le malaga o le 2023, o le ala e le'i ūia muamua. O lona uiga, e leai lava se tautai fia ma'ema'e na te mafaia ona faitau le lauamanu ma itea manū o taeao ma le lumanai. Tau lava o lea le au uso pele e, o la a le Poto: *'Ia e faatuatua i le Atua ma lou loto atoa, ae aua le faalagolago i lou lava atamai. Ia e manatua o Ia i ou ala uma, ona faatonuina ai lea e Ia lava ou ala.'* (Faataoto 3:5,6). Tautai pea le Atua o manuia i le Malaga a lana Ekalesia ma ona tagata i lenei tausaga fou.

Palemia Tauiliili Reupena (FT)

EFKS Samalaeulu, Pulega Gagaemauga

Matagaluega Itu o Tane

ASO SA, 1 Ianuari 2023.

Tusi Faitau: Kenese 1:1-5

Matua: Kenese 1:1 “Na faia e le Atua le lagi ma le lalolagi i le amataga.”

Manatu Autu: “O le Atua o le Atoaga o mea uma”

Faatupu manatu mo le Taitai:

O le fuaiupu muamua lava o le Tusi Paia; ‘Na faia e le Atua le lagi ma le lalolagi i le amataga,’ o le lamepa lava lea ua ia faamalamalamaina le mea atoa, e uiga i le Atua ma lona Silisili ese, o lana Pule Aoa, o lona Mana ma lona Poto. O le lagi ma le lalolagi na ia faia, e faa-Ao ia te ia, ae ogatotonu i le tagata na ia faia i lona Faatusa paia. O le famoemoe paia o le Atua, ia ola mama ma ia ola faapaiaina le tagata, ia le gata e faatumauina ai le mafutaga lelei ma le Atua, a ia manuia ai foi isi mea uma o le foafoaga.

Peitai, o le pa'ū ma le toilalo o le tagata i le agasala, o le faalavelaveina lava lea o le malamalama o le Alofa o le Atua mo le tagata ma le foafoaga. Ua faigata le olaga mo le tagata i ona itu uma. E ui ina lē fesiligia le Alofa o le Atua, ae o le Alofa e afifi ai lana amiotonu. O le upu moni, e saoloto le tagata e fai lana filifiliga, peitai, e leai sona saolotoga e filifilia ai le taunuuga o lana filifiliga. Ua mulimuli mai le faasalaga, e tuliloa le agasala; o le faaaliga lava lea o le faamasinoga amiotonu a le Atua.

Ua motu le soa i le mafutaga ma le Atua sa maua ai le manuia ma le saolotoga moni. Peitai, e le uma lona Alofa, aua o Etena lava na uluai alagaina ai le iuleo o le faamoemoe ... *O le a fanau mai le tama, na te tuimomomo le ulu o le gata.*

A o tatou i ai i uluai laasaga o le malaga o lenei foi Tausaga fou, e taua lava i lo'u taofi le toe tepa i le amataga. O fesili faatupu manatu; O ai na amata mea? O ai le amataga? O ai na faia le lagi ma le lalolagi? O ai na faia tatou? A o le a le faamoemoe na faia ai? E le taumate e i ai foi fita ma faigata o le savaliga o lenei tausaga, e pei foi ona ui mai ai i lenei tausaga. Ae a maua ma manino tali o nei fesili; ou te talitonu, o le tapasa lelei lea mo le malaga o lenei tausaga.

TALOSAGA:

FAAFETAI: Tatou faafetai i le Atua i lona alofa, ua tatou aulia mai ai lenei foi tausaga fou. E ui i le tele o faigata ma faafitauli o lona tausaga ua fano malie atu, ae sa ia tauave pea lo outou soifua ma lo matou ola i ona aao agalelei. Faafetai i lana foai ma lana faasoia mo aso taitasi, e le gata i le malosi, ae faapea foi i le poto ma le malamalama. Faafetai i le mafutaga ma le Agaga Paia, o loo tupu ai pea le faamoemoe mo ona tagata, i taimi o le solo lelei, ae faapena foi i aso faigata. Faafetai i le maliu o Keriso, ua tatou ola ai, aemaise o le faamoemoe mo le ola e faavavau mo tatou uma.

FAATOESEGA: Tatou faamaulalo i ona luma, ona o le tele ma le anoanoai o tatou sese ma leaga o loo faia pea. E le gata ua faatausui ai isi o tatou uso a tagata, ae faapea foi ona faamanu'alia ai lona finagalo paia. Suluia pea i tatou uma i le malamalama o lona alofa, ae o loo tuinanau pea o tatou loto i ata lafoia o le pogisa ma mea faafiafia o lenei lalolagi. Ua tatou faatamala i avanoa e tele ua ia tuu mai mo i tatou, ua valetu'ulima ana meaalofo, ua tatou le manatu mamafa i lana faasoia paia faale-aso. Tatou faatoese ma sulufai atu pea ia te ia, ina ia tatou maua lana faamagaloga e saoloto moni ai.

MANAOGA: Tatou tatalo i le Atua, ina ia taimua pea le malamalama o lona alofa i le malaga o lenei tausaga. Ia faamamalu ifo pea ona aao agalelei i tiute ma faiva ua ia tofofi i ai tatou. Ia i ai foi lana faamanuia i Aoga a nai fanau. Ia aogā foi le ola o ona tagata mo le manuia o tagata uma, ma le viiga o lona suafa. Ia na faapaiaina foi le ola tapuai o lana fanau, aua lona Malo ma lona atinaeina i le lalolagi. Galue mai pea lona agaga, ina ia fiafia lana fanau e tapuai ia te Ia i le agaga ma le faamaoni, ma fiafia e ola e faia lona finagalo. Tatalo ina ia manuia Samoa ma ona tagata, aemaise lana Ekalesia ma lana Galuega folafola o le Talalelei, ia Taitai ma tautai pea o Ia i le malaga o lenei tausaga.

ASO GAFUA, 2 IANUARI 2023.

Tusi Faitau: Mataio 6:27-33

Matua: Mataio 6:33 “A ia outou muai saili le Malo o le Atua ma lana amiotonu; ona faaopoopoina lea o ia mea uma ia te outou.”

Manatu Autu: “Ia faamuamua pea mea e tatau ona faamuamua”

Faatupu manatu mo le Taitai:

Ua seese malie atu le folauga o lenei tausaga. Ua faasolo foi ina galoma malie atu foliga o mea sa tutupu i le la tausaga, ui lava ina e i ai pea toatuga e faigata ona galo, e pei o aafiaga o le Koviti-19 i le soifuaga lautele o tagata uma, e le gata i Samoa nei, ae faapea le lalolagi atoa.

O le upu moni, e tu mati'e pea le Alofa Tunoa o le Atua i mea uma. Aua e ui i soifua sa maumau i lenei faama'i oti, ae le'i mafai e le tuga o nei puapuaga ogaoga, ona faateaeeseina i tatou mai le faamaoni o lona alofa, i le ua faamanatu mai e Iesu, i le tatau ona tepa taulai pea o le tagata faatuatua i lona siosiomaga, aemaise lava i mea e tatau ona ave i ai le faasili ma le faamuamua.

O lona finagalo faaalii i le siui o lana lauga lauiloa i luga o le mauga, sa ia matua faamamafa ai lava le tulaga lea. O le ave pea o le faasili ma le faamuamua a tagata uma, aemaise o le au faatuatua i le Atua, nai lo se isi lava mea, e oo lava i mea masani ona manaomia i le olaga. O lona finagalo, saili ma faatino muamua pea le finagalo o le Atua, ma faia pea lana amiotonu, faitalia le Atua ma isi mea o le ola. A o faamaopoopo apefoe folau o le malaga ua amatatia, aua nei galo le faamanatu a Keriso, 'soia ia le soona popole i mea o le ola nei; a ia outou muai saili le malo o le Atua ma lana amiotonu, ona faaopoopoina ai lea o ia mea uma ia te outou.'

TALOSAGA.

FAAFETAI: Tatou faafetai i le Atua i lana tausiga agalelei i aso uma, le saogalemu ma le fiafia o tatou maua pea i lona Alofa Tunoa. Faafetai i lana foai i mea o le tino e tausi ai lo tatou malosi. Faafetai i meaalofo o le Agaga, o saga faaauppegaina ai pea i tatou i le mana ma le malosi, e faatino ai tiute ma faiva ua ia valaauina ai tatou uma. Faafetai i lana puipuiga ma lana leoleoga faifai pea o tatou maua ai le saolotoga ma le saogalemu. Faafetai foi i lana foai paia o maua ai pea

fesootaiga lelei ma isi o tatou uso a tagata, tainane foi o tatou aiga ma fanau. Faafetai i lana Ekalesia ma le galuega o le Faaolataga o tala'ina pea, aua le faaolataga o tagata uma.

FAATOESEGA: Tatou faatoese i le Atua ona o le olaga mamao ese pea ma Ia. Tele ma anoanoai faamanuiaga tatou te maua mai ia te Ia, ae tatou te faatuatuanai pea le Atua ma lona finagalo. Ua tatou fiapopoto i le lalolagi tatou te lei faia, ma tatou fai manatu i mea e le oo i ai lo tatou malosi. Ua tatou faasili isi mea nai lo le Atua ma lona finagalo. Ua tatou tausili ia maua mea mo le tino, ae manatu māmā ai i le soifuaga sili faaleagaga. Tatou tatalo ina ia maua lana faamagaloga e ala i lona alofa tunoa.

MANAOGA: Tatou tatalo i le Atua ina ia manuia Samoa ma lona atinae. Ia manuia ona Taitai ma ona tagatanuu uma. Ia manuia ona fanua, ona maota ma laoa. Faamanuia i malo o loo agalelei mai i le atina'eina o Samoa. Ia manuia tagata faigaluega i Ofisa o Matagaluega eseese, aemaise i latou o loo galuea'ina le vao ma le gataifale. Ia manuia ana fanau a'oga, e le gata i Samoa nei, ae faapea i latou o aoaoina i atunuu e mamao. Ia manuia Kolisi faa-Faifeau uma i le atunuu, o aotauina ai le Au folafola o le Talalelei, ma Taitai o le Ekalesia mo a taeao. Ia tautai pea le Atua e pule i malaga i le folauga a Samoa i lenei tausaga. Ia auamanū mea i lona faatasi mai.

ASO LUA, 3 IANUARI 2023.

Tusi Faitau: Teuteronome 28:1-8

Matua: Teuteronome 28:8 'E pule le Alii ia manuia oe i lou fale saito, ma mea uma lava e tago i ai ou lima; na te famanuia foi ia te oe, i le ua foaina mai e le Alii lou Atua ia te oe.'

Manatu Autu: **“O manuia o le tagata faalogo ma usiusitai i le Atua”**

Faatupu manatu mo le Taitai:

E loloto ala o le Poto ma le Mana o le Atua, e ailililo foi ona ala. Peitai, e malamalama gofie lona finagalo. Faapefea ona iloa? E leai lava se mea e tasi na natia e le Atua ia Atamu ma Eva i le amataga. Sa ia faailoa ia te i laua tamaoaiga o le fanua i Etena i ona itu uma. Na ia ta'u foi i ai ma tapu o le fanua. Peitai, ua faasagaese o la loto

mai le Atua ona ua usitai i le tiapolo. Ua togisala le Atua ma tuliese a i laua, o ata manino ia o lona Alofa ma lana faamasinoga amiotonu.

O le auvae mauga lava o le mauga o Sinai na vevete ai upu o le Feagaiga a le Atua ma lona nuu sa nofo pologa i Aikupito. E fai le Atua ma 'Atua', a o Isaraelu e fai mona 'Nuu'. O le Feagaiga foi na alei i tulafono e sefulu e puipui ai. E ui lava la o loo taoto mai luma fita ma faigata o le ala, a o ona tala atu, o Kanana le nuu folafolaina, o lo tatou tofi e faavavau.

O upu mavaeaina faa-Teuteronome ao lei toe faaauuina le malaga; *'a faalogo ma usitai i le Atua, e manuia; ae a le faalogo ma le usitai i le Atua, e malaia'*. A faalautele, o e faalogo ma usiusitai i le Atua, e le gata e fai mo latou tofi Kanana, ae faatau manuia foi le gasologa o le olaga. E manuia le ato, manuia le palu falaoa, manuia le fanau, manuia le fanua, e mau le fale saito, manuia le alu, manuia foi le sau, aemaise mea uma e galuea'ina i lima..

O le feau faatupu malosi foi lea mo le malaga o lenei tausaga. O se feau maua soo, ae le faigofie ona faatino. Tauga tele le ola usiusitai ma faalogo i le Atua. Ua soona fetosoaina pea tatou aemaise nai fanau, i le mau tofotofoga ma leo eseese o le poto faalelalolagi i nei aso. Tautuana ia faitau ma sailiili pea i le Tusi Paia, aua o le ala-leo iloga lea o le Atua e fetalai ma faailoa mai ai pea lona finagalo mo tatou uma.

TALOSAGA:

FAAFETAI: Tatou faafetaia le Atua ma lona Alofa, aua o le alofa e le mavae, e le uma foi mo i tatou o lana fanau i le lalolagi. E ui ina fesui ai aso, masina ma tausaga, ae tumau pea lona alofa mo tatou uma lava. Tatou faafetaia le Atua i lana tausiga agalelei i aso uma, o malu ai pea lo tatou ola e ui i le tele o faigata ma fita. Tatou faafetaia lana leoleoga ma lana puipuiga o malutia ai pea lo tatou ola. Tatou faafetai i le Atua i lana foai paia ma lana faasoa, o tamaoaiga ai pea i tatou i mea lelei ma mea aoga e tele. Faafetaia le Atua i lana fesoasoani e ala i lona Agaga Paia. Faafetai i le Atua i le faaolataga ua tatou sapi ma saoloto ai.

FAATOESEGA: Tatou faatoese i le Atua i le anoanoai o mea sese ma mea leaga o afaina ai le tatou mafutaga ma Ia. Faamaulalo i le Atua ona o le lē mataala ma le lē faautauta i o tatou tiute ma faiva. Ua tatou galulue faatumutumulima, ua le faamaoni ona o le naunau i

le tau ma le mea faasili. Ua tatou faatamala i le aiga ma le tausia lelei o fanau, ua mafua ai ona avea nisi o i latou ma faafitauli i isi tagata. Faatoese i le Atua ona o le solia pea o ana poloaiga, ma lē usiusitai i lona finagalo. Faamaualalo i le Atua ona o lana Ekalesia ma ona tiute faaleagaga, ua tauau ina le atagia ai lona Paia ma lona mamalu, ona ua numia faatasi ma mea o le lalolagi.

MANAOGA: Tatou tatalo ina ia faamamalu ma faaloaloa mai pea ona aao alofa i luga o Samoa ma le malaga o lenei tausaga. Ia faamanuia le Atua i o tatou tiute ma faiva. Ia aumai lona malosi ma lona Poto e faatino ai soo se auaunaga mo le manuia o tagata uma. Ia leoleo e le Atua nai fanau i lo latou tutupu a’e, le ola aoaoina aemaise lo latou faaaogaina i soo se ala o lona finagalo. Ia faatupu e lona Agaga le alofa i isi Malo ina ia mafai ona latou fesoasani mai i le atinaeina o si o tatou atunuu. Ia faamanuia le Atua i tama fanau a Samoa o loo aumau i tulimanu eseese o le lalolagi, ma ia aua lava nei motusia lo latou sootaga ma le Atua i aso uma. Ia faamanuia foi le Atua i le soifua auauna ma le nofo tuavae o ona tagata i lana Ekalesia. Faamanuia foi i e o feagai pea ma faigata, o ma’i ma nisi puapuaga o le ola.

ASO LULU, 4 IANUARI 2023.

Tusi Faitau: Ioane 13:1-11

Matua: Ioane 13:7e. “Afai ou te le mulumulu ia te oe, e leai sou tofi faatasi ma a’u.”

Manatu Autu: “O le tiute faa-auauna, ma lona tofi i le malo o Keriso.”

Faatupu manatu mo le Taitai:

“O le ala i le Pule o le tautua.” O lona uiga, e le iuvale le ola tautua i le talitonuga faa-Samoa. E faapena foi le talitonuga faakerisiano. O lo’o faamauiina e Mataio le tasi o aoaoga mata’ina a Iesu e uiga i lenei lava mataupu. Sa ia faapea: *‘Aua ai se fia faasaogalemuina lona ola, e maumau ai ia te ia; a o le faamaumau lona ola ona o a’u, e maua e ia.’* O lona uiga, e i ai foi le taunuuga lelei o le olaga faa-auauna. A o le mea maua gata lea i nei aso, i soo se tafa o le olaga, aemaise foi i le Ekalesia; o ni auauna ma ni tagata fia tautua. Ua tele soo ae ua oge le au fia tautua.

O le pogai foi lea o le tetee o Peteru i le faatinoga faa-auauna a Iesu sa faia mo i latou i le tauafiafi o le latou mafutaga. Ua taoto e aai, ao Iesu ua tulai ma le apa vai, ma le ie soloi ma faasolo le galuega mulumulu vae i ona soo, e oo lava i vae o lē o le a faalataina o Ia. O le taele pito i maualalo lea o le olaga na oo iai Iesu, e aoao mai ai ona soo i le uiga moni o le olaga faatagata tautua. O le Matai ua auauna i ona soo, ma le Alii ua tuavae i ana tautua.

Na tetee Peteru ona e le malamalama i le uiga moni o le avea ma soo, seanoa lona le mafaia ona faatino le gaioiga faa-auauna ua faia e Iesu. Fetalai Iesu: “O le mea ou te faia, e te le iloa nei, ae mulimuli ane e te iloa.’ Faaauau pea le tetee a Peteru, ae tali Iesu; *‘Afai ou te le mulumulu ia te oe, e leai sou tofi faatasi ma au.’* Peiseai ua faapea atu Iesu, Peteru, afai e te le mafai ona faia le galuega moni faa-auauna, faatagata tautua, e leai sou tofi faatasi ma a’u i lo’u malo. Mo le malaga o lenei tausaga, taua tele lou soifua tautua, ma lau auaunaga faamaoni o faia mo lou aiga, lou nuu, lou malo ma lau Ekalesia ma soo se mea. O la Iesu, afai ua outou iloa ia mea, amuia outou pe a outou faia.

TALOSAGA:

FAAFETA: Tatou faafetai i le Atua mo lana Tusi Paia, aemaise o manatu taiala o lenei vaiaso atoa. O lona tamaoiga faaleagaga lea, e saga aoaoina ai pea i tatou i ona ala ma lona finagalo. Ia suluia pea o tatou ala uma o lenei tausaga, i ave malolosi o lona malamalama, ina ia aua nei faigofie ona sese ese tatou mai le moa o le ala. Tatou faafetaia lona Agaga Paia lo tatou fesoasoani sili, e le gata i mea faigata e le oo iai lo tatou malosi, ao mea foi e le ausia e lo tatou poto. Tainane lana fesoasoani mai i taimi e le sololelei ai le olaga, o lana faamaisega foi i taimi o faanoanoaga. Faafetai i lona Alo Pele e toatasi, o lē na tino ai lana Galuega tele o le Faaolataga. Ua tatou oaoa ai i faleseu ma saa i maa o malie ona o faamanuiaga o lona Alofa tele. Ua tatou ola foi ma le mautinoa, i le avanoa ua tatou maua i lona Malo e faavavau pe a moni le faatuatua ma le salamo.

FAATOESEGA: E leai lava se mea e tasi e lilo i lana silafaga ati. E le mafai foi ona lafi so tatou i ona luma. Ae tatou faatagisia pea lona alofa faamagalo, e faalanu ai le tele o mea sese o loo tatou faia pea. E sui tausaga ma masina ma aso, ae o loo tutumau pea le toatele o tatou i le olaga tuai. Le ola faamaualuga, fiasili, le ola manatu faapito, le

ola losilosivale, le ola masalosalo ma le lē talitonu. Tatou faamaulalo i le Atua i le olaga faavaeluaatai o fai pea ma vaivaiga masani. E iloa le Atua, ae le fiafia i le lotu, e toaga foi i le lotu, ae le fia faitaulaga. E faiaga i le Atua, ae taulamua i mea masani faalenuu, ia agalelei pea le Atua ma faamagalalo tatou.

MANAOGA: Tatou tatalo i le Atua ina ia manuia o tatou faiva ma tiute, ina ia manuia a tatou atinae ma pisinisi, ia manuia le eleele ma fanua, aua le fatuaigatausi ma le tautua ia te Ia, ae a le aiga ma le nuu. Ia agalelei mai le Atua i o tatou aiga, ia aumai lona alofa ina ia fusia ai tatou uma, ina ia tatou ola ma nonofo i ni aiga fealofani ma maopoopo. Ia fesoasoani mai o Ia, i la tatou galuega faatonutonu i a tatou fanau, ina ia ola tusaafia i latou i ona luma, ma luma o isi tagata. Ia fotu lautele lana Talalelei i o tatou olaga taitoatasi, ina ia avea o tatou aiga ma ona aiga i le lalolagi. Tatou tatalo mo le au matutua o Samoa, o e ua faaseetuagalua i feau masani, ina ia tausila pea i latou i le mana o le Atua, aua o latou faiva tatalo mo tatou uma. Ia agalelei le Tautai sili i le malaga o lenei tausaga.

ASO TOFI, 5 IANUARI 2023.

Tusi Faitau: Filipi 4:8-9

Matua: Filipi 4:9 “O mea uma foi ua aoaoina ai outou, ma outou talia, ma outou faalogo i ai, ma outou vaai mai ia te au, ia outou faia ia lava mea; ona ia te outou lea o le Atua e ona le manuia.”

Manatu Autu: “Ia tausili i mea e manuia moni ai.”

Faatupu manatu mo le Taitai:

O le aoaoga topito a Iesu e tusa o le molimau a Ioane, o tatou lava o ona tagata, ae le ni tagata o le lalolagi tatou. O lona uiga, e maualuga lo tatou valaauina e fai ma tagata o lona malo. O lana Upu, ‘*a e le ni o le lalolagi outou, a ua ou filifilia outou nai le lalolagi.*’ Manino ma malamalama lelei le saunoaga a Iesu. Ai lava foi, o le uiga loloto lea sa taoto i le faavae o le lalolagi ma le faia ai o le tagata i le ‘Faatusa Paia’ o le Atua. O tatou lava o lana fanau ma ona tagata mo Ia e faavavau.

A o le fu’a tualuga foi lea o aoaoga a le Aposetolo o Nuuese ma lona iloa o le Talalelei a Keriso. O lona taofi, o le Faaolataga o tagata uma, o le mea e patino i le alofa Tunoa o le Atua. O lana valaau mo

tagata uma, ia ola tagata uma i le faatuatua faamaoni i le Atua, ina ia maua le faaolataga. Ia tumau foi i le olaga mama ma le ola faapaiaina.

E talitonu Paulo, o tatou o tagata o le Toetu, o tagata ua faaolaina i le faatuatua ia Keriso, ma e le tatau lava ona toe maua ina lo tatou ola i le otaota ma isi mea faatauvaa o le olaga. O le mafuaaga lea o lana upu faamalosi i le au uso i Filipi. Peiseai ua ia faapea atu; O le toe upu lenei, a fia maua mafutaga lelei, a fia manuia outou faiva, a fia maopoopo aiga ma mautu fanau, ma folau pea i manū i aso uma; ia tausili na’o mea ua moni, o mea ua tauleleia, tepa taulai i mea ua tonu, mea ua mamā, aemaise o mea matagofie ma mea logolelei ma le amio lelei. Soia ia le talitonu i mea e le moni, faautauta lelei i le soona naunau i le tele o mea faafiafia o le olaga nei, ae afaina ai le ola. Ia mataala foi nei lolo le malosi i mea e faamanualia ai le finagalo o le Atua, ma afaina ai le ola o isi uso a tagata.

O lea foi se faamanatu lelei mo le sopo o lenei tausaga. Ia faamuamua pea ona tausili e faatino mea ua aoaoina mai e Keriso e ala i lana Tusi Paia e maua ai le Filemu ma mea lelei. E ui ina faigata, ae o mea ia e maua ai manuia moni, mautu ai aiga, iu lelei ai fanau, e manuia ai Malo, aemaise le atinaeina o lana Ekalesia.

TALOSAGA:

FAAFETAI: Tatou faafetai i le Atua i lana tausiga alofa faifai pea i lo taotu ola aemaise o ana faamanuiaga i le tino, mafaufau ma le Agaga. Faafetai i lona onosai ma le lava papale i a tatou tu ma aga le tatau, o tatou faia pea lava pea i lea aso ma lea aso. Faafetai mo le Talalelei ma ona tamaoiga faaleagaga ua manuia ai vaega uma o lo tatou olaga. Faafetai mo lana Ekalesia o fai pea mona Tino vaaia i le lalolagi, e faaaauina lana Galuega o le Faaolataga mo tagata uma. Faafetai le Atua ona o le Galuega mae’a o le Faaolataga na ia saunia e ala ia Iesu Keriso lona Alo.

FAATOESEGA: Tatou faatoese i le Atua ona o le vale tuulima o le tele o ana meaalofa taua mo tatou. Tele taimi ua soona faaaluvale ai i mea le aoga, o le malosi ua tuivale i mea e le taua, tainane foi taleni ua faaaoga faaletatau, ona o le tuinanau ma le manao tele. Tatou faamaulalo ona o le leai o se avanoa, e faatalitali ai i le faaali mai o le Atua e ala i lona Agaga i mea e ao ina tatou fai.

MANAOGA: Tatou talosia si o tatou atunuu ma lana faigamalo, ina ia maua pea e ona Taitai le agaga o le loto maualalo e saili fesoasoani ai i le Agaga o le Atua, aua fuafuaga lelei mo le manuia o Samoa. O a foi ni mea faatupumala o tau lalata mai, aemaise o ni faama'i, ia alofa le Atua ma puipui Samoa ma ona tagata. Ia alofagia e le Atua le atinae o lana Ekalesia, ina ia faamanuia tagata lotu uma, aemaise o le 'au galulue i ana Galuega faapitoa. Ia faamanaina pea e le Atua lana Galuega molimau i le lalolagi atoa. Tatou tuuina atu i le Atua o tatou aiga aemaise nai fanau, ina ia ola i latou i le mata'u ma le ava i le Atua. Tatou tatalo i le Atua ina ia auomanū le malaga umi o lenei tausaga i lona alofa tausii mai.

ASO FARAILE, 6 IANUARI 2023:

Tusi Faitau: Mareko 3:20-27

Matua: Mareko 3:25 "Afai foi e fevaevaeai se aiga, e le mafai ona tumau o lona aiga."

Manatu Autu: "O le tāua o le tutu faatasi."

Faatupu manatu mo le Taitai:

E anoanoai aoaoga a le Tusi Paia e faatatau i lenei mataupu taua, o le tutu faatasi, poo le galulue faatasi poo le nonofo faatasi. O lona uiga, e matua taua tele i le finagalo o le Atua le ola ma le nonofo lelei faatasi o lana fanau. O filosofia foi e tele o le olaga, aemaise foi i le faa-samoa, e atagia ai foi le taua o lenei lava mataupu. E pei, 'o le tele o sulu e maua ai figota, o le tele o lima e mama ai se avega.'

A o lea foi ua faamautinoa mai e Iesu lava ia, le taua o le tutu faatasi, ma le galulue faatasi mo le mautu ma le mausali o se mafutaga. O le molimau a Mareko, ua manatu nisi o lona aiga, o Iesu ua faaletonu lona mafaufau, a o le au faresaio ua fai mai, o Iesu ua ia te Ia le Pelesepulo, o le alii ia o temoni. A ua tali atu Iesu, "E mafai fapefea e satani ona tulia ia satani? Afai foi e fevaevaeai se malo, e le mafai ona tumau lona malo. Afai foi e fevaevaeai se aiga, e le mafai ona tumau o lona aiga."

Ua aoga le tali a Iesu i tuuaiga ua faasaga ia te Ia, ua ia faamanatu mai ai lenei aoaoga taua mo tatou uma. O le taua o le tutu faatasi i taimi uma; aemaise mo le maopoopoga ma le manuia o se mafutaga, poo seisi lava fuafuaga ma soo se faamoemoeaga lelei. Ua Ia matua faato le fevaevaeai ma le felautoa'i. E taua i lona finagalo le

maopoopo, le galulue faatasi ma le felagolagomai aemaise, o le tutu faatasi e opogi se faamoemoe lelei mo le manuia o tagata uma.

O le upu moni, poo le aiga, poo le nuu, poo le malo, poo le ekalesia foi, a fia manuia ma mautu, muamua, ia faasili le Atua, lua, o le tutu faatasi ma le felagolagomai e maua ai. O a fuafuaga ma lavasiga o lenei tausaga, e a'e fua le faiva, pe a tatou le tutu faatasi ma galulue faatasi. Tuu ese ia le felotoa'i ma le felamata'i, a ia maua le fealofani ma le agaga o le galulue faatasi. O moomooga o Iesu e pei ona iloa i lana tatalo faa Ositaulaga, ia tasi le fanau a le Atua i le lalolagi, e faapei o Ia ma lona Tama, e tasi lava i la'ua.

TALOSAGA:

FAAFETA: Tatou faafetai i le Atua i le ola ma le malosi ma ona faamanuiaga eseese i lea aso ma lea aso. Faafetai i le agalelei o isi tagata mo i tatou, aemaise foi o avanoa ua tino ai lo tatou alofa mo isi uso a tagata. Faafetai i le fesoasoani mai o le Agaga Paia i mea uma, aemaise i mea tatou te le mafaia, ma le iloa. Faafetai mo faigata ma luitau eseese o le ola, e saga faatupu ai pea lo tatou talitonu i lona mana ma lona malosi. Faafetai mo le faaolataga mo tatou uma, e ala ia Iesu Keriso lo tatou Alii.

FAATOESEGA: Tatou faamaulalo i le Atua ona o le fevaevaeai ma le felotoa'i o lana fanau. Faatoese ona o mea sese ua fai ma le mautinoa, tainane foi le faatamala ua pauu ai pea. Ia agalelei le Atua i lo tatou vaivai faaleagaga, ina ia galue mai pea lona Agaga Paia, e faatupu le salamo faamaoni i o tatou loto, ma toe foi ai ma le agaga atoatoa ia te Ia. Ia faamalosi i tatou i lona malamalama, e ui ma savavali ai i lona malamalama i taimi uma.

MANAOGA: Tatou lalafa i le Atua mea uma o loo mamafa i o tatou loto. Ia fesoasoani mai lona Agaga e faamatalaloto le uiga o mea e tutupu i lea taimi ma lea taimi. Ia faasusulu mai pea lona malamalama, e taialaina ai mea uma tatou te fai, aemaise o fuafuaga mo se manuia o le lumanai. Agalelei le Atua ia tatou atinae, aemaise foi tiute ma faiva o galulue ai, ina ia faia mea uma e tusa o ala o lona finagalo. Alofagia e le Atua i latou o feagai ma puapuaga ma faigata o le olaga i lenei aso. Ia latou maua lona mafanafana, aemaise lona Filemu. Talosia foi i lona alofa toega o lenei vaiasosa. Tautai pea lona Agaga i le folauga o lenei tausaga.

ASO TOONAI, 7 IANUARI 2023:

Tusi Faitau: Galuega 9:1-9

Matua: Galuega 9:6a “Le Alii e, se a le mea e te finagalo iai ou te faia?”

Manatu Autu: “O tagata o le Atua, e tatau ona latou faia lona finagalo.”

Faatupu manatu mo le Taitai:

O le manulauti lava e masani ona faalaeiau ai Faifeau mo le galuega tala’i e le au matutua; ‘Fai le Galuega a le Atua i ala o le Atua.’ E silafia lelei e i latou na mua i malae i le Galuega, e ese loa ala e fai ai le Galuega, tutupu loa faigata ma faalavelave. Peitai, o se upu e aoga foi mo tagata uma o le Atua i lana Ekalesia. Aua o tagata lotu, Aoa ma tiakono, mafutaga a Tina ma le Ekalesia, e tatau lava ona mulimuli i ala o le Atua ma faia lona finagalo. O le pogai e tutupu ai pefea ma maua ai feteenaiga i totonu o mafutaga a le fanau a le Atua, ona ua aumai i totonu o le li’o faaleEkalesia, uiga ma ala ma faiga masani faalelalolagi.

Na valaauina e Iesu Saulo e fai ma aposetolo o nuuese o faasaga lona loto ma ona mata i le lalolagi. E masausau atu ma le ita e saisai tagata o le Atua, ae taia e le Atua i lona malamalama, ma toe faafaasaga mai lona loto i le Atua. O le taimi lava na ia mautinoa ai Iesu, tapatapa loa pe se a lona finagalo. O le upu moni, e lei toe iai lava se ituaso o le soifua atoa o Paulo na toe tepa ese ai ona mata ma lona loto mai ia Iesu. Aisea? Ua le o toe ola ia, ao Keriso ua soifua i totonu ia te ia. Fai mai lana tautinoga manaia i le au kerisiano i Filipi; ‘E le peiseai ua ou maua nei, po ua ou atoatoa ona lelei nei, ’a ou te tausisi atu pea pe mafai ona ou maua le mea na maua ai au e Keriso Iesu.’ O lona uiga, o le taimi lava na valaauina ai Paulo, ma saofai i le saofaiga a soo o Keriso, e lei toe lualuagia lava lona loto i se isi lava mea o le lalolagi.

O le feau faatupu manatu lea mo tatou uma. O tagata lava ia o le Atua, e tatau lava ona ola e fai le finagalo o le Atua, ma tausisi i ona ala i aso uma ma taimi uma. E tele a tatou fuafuaga ma faamoemoega lelei e le taunuu e pei foi ona iloa i le la tausaga. E vaemanua foi le tele o tatou tiute ma faiva. Aisea? E tele mafuaaga, ae o le pogai autu lava, ua tatou le savavali i ala o le Atua ma le faia lona finagalo. Ao faagasolo le malaga o lenei tausaga, taua lava le faatuatua, tatalo ma

faalologo pea i le musumusuga a le Agaga Paia, pe se a le finagalo o le Atua mo i tatou o lana fanau. O ia lava na fetalai; faauta, ou te ia te outou pea lava e oo lava i le gataaga o le lalolagi.

TALOSAGA:

FAAFETAI: Faafetai i le Atua mo meaalofoa e tele o lo’o tamaoiga ai pea lo tatou ola. Faafetai mo ana faamanuiaga i o tatou aiga, aemaise nai fanau. Faafetai i lona faaaogaina pea o lo tatou faatauvaia i ana feau ma lona finagalo. Faafetai mo le faamoemoe le uma ia Iesu Keriso lo tatou Alii, aemaise lava i le Faaolataga mo tatou uma.

FAATOESEGA: Tatou faatoese i le Atua i lo tatou le manatuaina o Ia i le tele o taimi. Tiga lava ona tatou maua le malosi ma le ola mai ia te Ia, ae le mafai lava lo tatou tuinanau i mea o le lalolagi. Tatou faamaulalo i le Atua ona o tatou isi soo le faamaoni. E ta’ua i tatou o ona tagata, ae tatou te le faia lona finagalo. E iloa i tatou o lana fanau, ae tatou te le ususitai ia te Ia i aso uma. Tatou faatoese i le ola soonafai ma le manatu fapito ua afaina ai isi o tatou uso a tagata, aemaise lo tatou siosiomaga. Ia maua pea e i tatou lana faamagaloga e saoloto ai.

MANAOGA: Tatou lafoai i le Atua faamoemoega ma fuafuaga uma o lenei tausaga. O ia lava na te silafia mea e aoga ma lelei mo tatou. Tatou talosia le tapenapena o nai fanau mo le toe amatalia foi o aoaoga i lenei tausaga, ina ia alofagia e le Atua e leoleoina ma puipuia i latou mai ni faama’i ma ni faalavelave. Ia aua foi nei manumalo ni tofotofoga i o latou loto. Faamanuia foi le Atua i o latou faiaoga, ina ia foai le tomali ma faalautele agavaa, aua lava le aoaoina o fanau. Tatou talosia le gasologa o lenei aso, aemaise le tapena atu mo lona Aso Paia a taeao, ina ia uli ma sao mea uma i le faatasi mai o le Atua. Ia faatonutonu folau pea ma ia leoleoina i tatou e lona Agaga i le malaga o lenei tausaga.